

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 12 DISEMBER 2012, PUKUL 10.00 PAGI

Bil. 24

PERTANYAAN-PERTANYAAN BAGI JAWAB LISAN

1. PN-1253-L15481
Tuan Haji Ahamat @ Ahamad bin Yusop minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah bentuk pemantauan yang diambil oleh Suruhanjaya Syarikat Malaysia (SSM) terhadap mana-mana syarikat yang melanggar Akta Syarikat 1965 terutamanya yang melibatkan keselamatan negara seperti isu SUARAM yang jelas menerima dana asing dalam menjalankan aktivitinya sebagai sebuah NGO yang tidak berdaftar dan berselindung di sebalik pendaftaran Suara Inisiatif Sdn. Bhd. (SISB).
2. PN-1253-L15671
Dato' Abdul Rahim bin Abdul Rahman minta **MENTERI BELIA DAN SUKAN** menyatakan perancangan Kerajaan bagi memastikan negara dapat melahirkan ahli sukan yang berkualiti dan bertaraf dunia memandangkan peranan sukan di dalam pembinaan semangat nasionalisme dan perpaduan rakyat.
3. PN-1253-L15462
Tuan Haji Muhamad Yusof bin Husin minta **PERDANA MENTERI** menyatakan apakah Kerajaan masih mengekalkan Dasar Pandang Ke Timur yang diperkenalkan pada tahun 1982, jika ya, apakah langkah-langkah yang diambil untuk memenuhi matlamat tersebut.
4. PN-1253-L16069
Tuan Mohd. Khalid bin Ahmad minta **MENTERI PENGANGKUTAN** menyatakan apakah tindakan yang akan diambil oleh Kementerian untuk mengatasi masalah Terminal Feri Jabatan Laut Kuala Perlis yang sering mengalami masalah feri untuk berlabuh disebabkan dasar laut cetek akibat pemendapan lumpur.
5. PN-1253-L15876
Dato' Boon Som a/l Inong minta **PERDANA MENTERI** menyatakan jumlah rakyat Malaysia yang bertugas di luar negara mengikut sektor serta sejauh manakah kejayaan usaha untuk menarik rakyat Malaysia yang bertugas di luar negara kembali berkhidmat dan menyumbangkan khidmat mereka di negara ini.

6. PN-1253-L15441
Dato' Dr. Johari bin Mat minta **MENTERI PELAJARAN** menyatakan sejauh manakah pemantauan yang dilakukan oleh pihak Kementerian terhadap guru-guru yang bermasalah di sekolah-sekolah seperti gangguan mental dan LGBT kerana ia memberi kesan yang negatif kepada generasi Malaysia akan datang.
7. PN-1253-L16033
Datuk Raja Ropiaah binti Raja Abdullah minta **MENTERI KEWANGAN** menyatakan tentang sistem yang diguna pakai sekarang dalam penawaran *Central Contract* dan mencadangkan supaya Kerajaan mengkaji semula sistem *Central Contract* yang dilaksanakan sekarang untuk menentukan harga yang kompetitif dan terbaik sekali dapat diperoleh oleh Kerajaan yang pada jangka panjangnya boleh menjimatkan perbelanjaan negara dengan mendapat kualiti yang tinggi dan harga terbaik sekali.
8. PN-1253-L15981
Dr. Syed Husin Ali minta **MENTERI PENGANGKUTAN** menyatakan adakah terdapat pembelian komponen yang sudah tidak digunakan lagi atau *outdated* bagi tujuan kawalan trafik udara.
9. PN-1253-L15376
Tuan Haji Abdul Shukor bin Mohd Sultan minta **MENTERI KEWANGAN** menyatakan apakah faktor-faktor yang diambil kira oleh Kementerian dalam usaha menurunkan harga kenderaan dari segi duti eksais dan cukai-cukai lain supaya benar-benar memberi manfaat kepada rakyat.
10. PN-1253-L15533
Datuk Kadzim M. Yahya minta **PERDANA MENTERI** menyatakan apakah Petronas bercadang untuk membina lagi Pusat Latihan Teknikal separa mahir bagi memastikan lebih ramai anak-anak tempatan Sabah menceburji bidang petroleum dan gas memandangkan kegiatan menggali minyak dan gas giat dijalankan di perairan Sabah dan Sarawak.
11. PN-1253-L15818
Dato' Mohammed Najeeb bin Abdullah minta **MENTERI BELIA DAN SUKAN** menyatakan kenapa gejala rasuah bola sepak masih berlaku di negara ini walaupun langkah-langkah tegas telah diperkenalkan. Apakah pasukan khas yang dibentuk yang terdiri daripada PDRM, SPRM dan FAM masih lagi berfungsi dan memantau keadaan.
12. PN-1253-L16014
Tuan Subramaniam a/l Veruthasalam minta **MENTERI KEWANGAN** menyatakan sama ada Bank Negara sedang memantau tindakan sesetengah syarikat insurans yang memaksa pembeli insurans pihak ketiga juga membeli insurans kemalangan peribadi.
13. PN-1253-L15495
Dato' Nalla K. S. minta **MENTERI PERDAGANGAN ANTARABANGSA DAN INDUSTRI** menyatakan bilangan atau peratusan kaum India yang telah memohon bantuan pinjaman industri kecil dan sederhana (IKS) melalui SME Corp. dan berapa yang telah diluluskan.

14. PN-1253-L15546
Dato' Lim Nget Yoon minta **MENTERI PENGANGKUTAN** menyatakan tindakan diambil oleh Kementerian untuk menangani masalah orang ramai membuang sampah daripada kenderaan-kenderaan dalam perjalanan. Pembuangan sampah daripada kenderaan boleh membawa maut kepada penunggang motosikal dan basikal.
15. PN-1253-L15654
Tuan Khoo Soo Seang minta **MENTERI SUMBER ASLI DAN ALAM SEKITAR** menyatakan bilangan bangunan yang sudah siap dibina dan diduduki tetapi masih belum lagi mendapat *strata title* di negeri Johor. Apakah tempoh paling lama yang belum dapat *strata title* serta sebab-sebabnya dan tindakan susulan yang diambil untuk menjaga kepentingan para pemilik unit.
16. PN-1253-L15681
Puan S. Bagiam a/p Ayem Perumal minta **PERDANA MENTERI** menyatakan apakah fungsi Yayasan Usahawan Baru dan apakah langkah-langkah Kementerian untuk menggalakkan lebih ramai belia menjadi usahawan serta berapakah jumlah bilangan belia India yang telah melibatkan diri dalam program ini.
17. PN-1253-L16001
Tuan Subramiam a/l Veruthasalam minta **MENTERI KEWANGAN** menyatakan apakah jumlah rumah mampu milik yang dibina oleh SPNB di seluruh Malaysia, mengikut negeri, dan berapa unit yang dibina atas usaha Kerajaan Persekutuan berbanding unit yang dibina oleh Kerajaan Negeri.
18. PN-1253-L15936
Dato' Dr. Firdaus bin Haji Abdullah minta **MENTERI PELAJARAN** menyatakan langkah-langkah pemantauan yang dilakukan untuk memastikan pelaksanaan dan mengukur kejayaan dasar MBMMBI.
19. PN-1253-L15410
To' Puan Hajah Zaitun binti Haji Mat Amin minta **MENTERI KEWANGAN** menyatakan rasionalkah langkah Kumpulan Wang Simpanan Pekerja (KWSP) untuk terus membeli bangunan dan melabur dalam sektor harta tanah di London dan Australia.
20. PN-1253-L15702
Datuk Haji Yunus bin Haji Kurus minta **PERDANA MENTERI** menyatakan adakah usaha-usaha dijalankan oleh pihak Kementerian untuk menghantar pulang penduduk yang memegang status pelarian dari Filipina yang menetap di Labuan dan Sabah setelah perjanjian damai diwujudkan di selatan Filipina.
21. PN-1253-L15727
Tuan Chiew Lian Keng minta **MENTERI WILAYAH PERSEKUTUAN DAN KESEJAHTERAAN BANDAR** menyatakan mengapa banyak pusat hiburan malam dan pusat internet perjudian beroperasi tanpa lesen di Kuala Lumpur tidak diambil tindakan tegas.

22. PN-1253-L15900

Datuk Chin Su Phin minta **MENTERI DALAM NEGERI** menyatakan berapakah jumlah kematian yang direkodkan akibat kejadian bunuh diri dari tahun 2002 sehingga 2012 dan apakah langkah-langkah yang diambil oleh Kerajaan dalam memastikan kejadian ini tidak bertambah serius pada masa akan datang.

23. PN-1253-L15581

Datuk Pau Chiong Ung minta **MENTERI KESIHATAN** menyatakan:-

- (a) mengikut laporan Kementerian pada awal bulan Oktober 2012, seramai 8000 orang jururawat terlatih dalam negara tidak berjaya mendapat jawatan, apakah faktor-faktor yang menyebabkan pengangguran tersebut; dan
- (b) adakah jururawat terlatih tersebut dapat bekerja di luar negara memandangkan profesion ini mempunyai pasaran di luar negara.

24. PN-1253-L16037

Puan Roslin binti Haji Abdul Rahman minta **MENTERI WILAYAH PERSEKUTUAN DAN KESEJAHTERAAN BANDAR** menyatakan langkah-langkah Kementerian bagi mengindahkan Sungai Klang khususnya melalui *Projek River of Life*.

25. PN-1253-L15748

Dato' Jaspal Singh minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan kes yang telah dilaporkan bagi penderaan kanak-kanak mengikut pecahan negeri dan bangsa. Apakah tindakan yang diambil kira oleh Kementerian bagi memastikan keselamatan, kebijakan dan masa depan kanak-kanak yang didera ini dilindungi.

26. PN-1253-L15610

Tuan Syed Shahir bin Syed Mohamud minta **MENTERI PERTANIAN DAN INDUSTRI ASAS TANI** menyatakan jumlah peruntukan untuk maksud penyelidikan & pembangunan (R&D) dalam hal pengeluaran tanaman makanan dan apakah langkah-langkah yang diambil untuk menarik golongan muda bagi menyertai sektor tersebut.

27. PN-1253-L15967

Dr. Syed Husin Ali minta **MENTERI PENGAJIAN TINGGI** menyatakan apakah kaedah yang digunakan untuk melantik Naib Canselor di IPTA dan apakah MPP mempunyai ruang untuk menyatakan pendapat sebelum proses lantikan.

28. PN-1253-L16099

Dato' Syed Ibrahim bin Kader minta **MENTERI WILAYAH PERSEKUTUAN DAN KESEJAHTERAAN BANDAR** menyatakan kejadian banjir kilat sering berlaku terutamanya di kawasan Bandaraya yang menyebabkan pelbagai masalah timbul walaupun pelbagai alternatif telah dilaksanakan seperti terowong SMART. Apakah perancangan Kementerian bagi mengatasi masalah ini.

29. PN-1253-L16056

Tuan Mohd. Khalid bin Ahmad minta **MENTERI TENAGA, TEKNOLOGI HIJAU DAN AIR** menyatakan adakah Suruhanjaya Tenaga telah membuat kajian di atas:-

- (a) cadangan Persatuan Penyelidikan Air dan Tenaga Malaysia (AWER) supaya hanya satu Label Pengesahan Kecekapan Tenaga dikuatkuasakan di Malaysia bagi produk elektrik bagi menjamin kepentingan pengguna; dan
- (b) cadangan AWER untuk Kementerian melaksanakan Piawaian Minimum Prestasi Tenaga (MEPS) berfungsi sebagai standard umum bagi produk import dan yang dihasilkan dalam negara dan larangan import bagi produk yang di bawah piawaian MEPS iaitu seperti yang telah pun dilaksanakan di beberapa negara Eropah, Jepun dan Thailand.

30. PN-1253-L15734

Tuan Mohamad Ezam bin Mhd Nor minta **MENTERI PENGAJIAN TINGGI** menyatakan jumlah pelajar asing yang terdaftar secara sah dan bandingannya dengan visa pelajar yang dikeluarkan oleh Jabatan Imigresen Malaysia. Sejauh mana pemantauan terhadap keaktifan pelajar ini di bidang akademik berbanding gejala negatif serta kes jenayah yang dilakukan oleh mereka.

31. PN-1253-L15405

Puan Hajah Rohani binti Abdullah minta **MENTERI PELAJARAN** menyatakan adakah Kementerian bercadang mewajibkan semua warga asing di negara ini mengikuti ujian kecekapan Bahasa Melayu sebagai usaha untuk memartabatkan Bahasa Kebangsaan di kalangan warga asing di negara ini.

32. PN-1253-L15844

Tuan Saiful Izham bin Ramli minta **MENTERI WILAYAH PERSEKUTUAN DAN KESEJAHTERAAN BANDAR** menyatakan tentang peruntukan sebanyak RM500 juta di dalam Bajet 2013 untuk tujuan pemuliharaan Sungai Klang. Sehingga kini, berapakah yang telah dibelanjakan untuk memulihara Sungai Klang dan syarikat manakah yang telah diberi kontrak tersebut serta apakah skop kerja di bawah kontrak tersebut, sekiranya ada.

33. PN-1253-L16042

Puan Roslin binti Haji Abdul Rahman minta **PERDANA MENTERI** menyatakan langkah-langkah bagi menubuhkan lebih banyak institusi wakaf korporat bagi membantu Institusi Pengajian Tinggi Awam (IPTA) menjana kewangan.

34. PN-1253-L15920

Puan Hajah Dayang Madinah binti Tun Abang Haji Openg minta **MENTERI PENERANGAN, KOMUNIKASI DAN KEBUDAYAAN** menyatakan apakah impak positif yang dapat diterjemahkan hasil daripada penglibatan Generasi Y dalam sambutan kemerdekaan pada "Himpunan 55 tahun Merdeka: Janji Ditepati" baru-baru ini.

35. PN-1253-L15719
Tuan Chiew Lian Keng minta **MENTERI PENGAJIAN TINGGI** menyatakan bilangan pelajar asing yang menuntut di institusi pengajian tinggi awam serta negara asal mereka.
36. PN-1253-L15562
Puan Norliza binti Abdul Rahim minta **MENTERI PERUMAHAN DAN KERAJAAN TEMPATAN** menyatakan apakah langkah-langkah Kerajaan dalam membanteras iklan-iklan pinjaman haram yang semakin berleluasa.
37. PN-1253-L15401
Puan Hajah Rohani binti Abdullah minta **MENTERI PEMBANGUNAN WANITA, KELUARGA DAN MASYARAKAT** menyatakan sejauh manakah keberkesanan Program 1AZAM kepada peserta-peserta dalam membantu sosioekonomi mereka dan adakah Kementerian bercadang meneruskan lagi projek ini bagi tahun 2013.
38. PN-1253-L15772
Puan Hajah Mariany binti Mohammad Yit minta **PERDANA MENTERI** menyatakan apakah bentuk tindakan serta merta dan komprehensif untuk menguatkuaskan secara tegas dan tanpa kompromi bagi masalah kenderaan dagangan yang membawa muatan melebihi had beban yang dibenarkan dan kelajuan yang melebihi had kelajuan kebangsaan kerana kos kerosakan jalan raya yang tinggi terpaksa ditanggung oleh Kerajaan dan penyumbang kepada kemalangan di jalan raya yang tinggi.
39. PN-1253-L15869
Dato' Boon Som a/l Inong minta **MENTERI PENGAJIAN TINGGI** menyatakan sejauh manakah langkah-langkah telah dilakukan oleh pihak universiti awam tempatan, termasuk Universiti Teknologi MARA, untuk mengambil pelajar-pelajar di kalangan masyarakat Siam bagi melanjutkan pelajaran di universiti masing-masing.
40. PN-1253-L15786
Puan Chew Lee Giok minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah kes pembuangan bayi dalam 5 tahun kebelakangan ini, adakah trend ini meningkat, dan apakah langkah-langkah yang boleh diambil untuk mengatasi masalah perempuan yang hamil sebelum nikah.
41. PN-1253-L16145
Tuan Baharudin bin Abu Bakar minta **MENTERI WILAYAH PERSEKUTUAN DAN KESEJAHTERAAN BANDAR** menyatakan pusat-pusat hiburan, ada sesetengahnya terletak lot kedai berhampiran kawasan perumahan mengganggu kerana beroperasi sehingga lewat pagi. Perlu penjelasan daripada pihak DBKL berhubung pemberian lesen untuk beroperasi dan waktu yang ditetapkan.
42. PN-1253-L15566
Dato' Lim Nget Yoon minta **MENTERI DALAM NEGERI** menyatakan apakah langkah-langkah konkrit yang diambil oleh pihak-pihak berkenaan untuk memastikan orang-orang asing tidak menyeludup dadah ke negara ini.

43. PN-1253-L15431
Dato' Dr. Johari bin Mat minta **MENTERI PERTANIAN DAN INDUSTRI ASAS TANI** menyatakan jumlah kluasan tanah sawah yang tidak dapat diusahakan di Kelantan dan kenapa, serta usaha-usaha Kementerian dalam mengatasi perkara ini.
44. PN-1253-L15642
Tuan Khoo Soo Seang minta **MENTERI PENGAJIAN TINGGI** menyatakan tindakan dan langkah-langkah yang sedang dan akan diambil terhadap Institusi-institusi Pengajian Tinggi Swasta yang mengambil penuntut-penuntut palsu dan apakah tindakan-tindakan pencegahan.
45. PN-1253-L15511
Dato' Haji Abdul Rahman bin Bakar minta **PERDANA MENTERI** menyatakan berapa jumlah bayaran royalti minyak yang telah dibayar oleh Petronas kepada Kerajaan Negeri Terengganu sejak merdeka dan cadangan kenaikan bayaran royalti minyak bagi negeri Terengganu.
46. PN-1253-L15977
Puan Hajah Noriah binti Mahat minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah pengemis jalanan yang ditangkap terdiri daripada warganegara dan bukan warganegara dan di manakah mereka ditempatkan.
47. PN-1253-L15794
Puan Chew Lee Giok minta **MENTERI DALAM NEGERI** menyatakan jumlah anggota polis baru yang telah ditambah daripada tahun 2010 hingga 2012 untuk mengurangkan berlakunya kes-kes rompakan dan jenayah, berapakah pertambahan balai polis dan pondok polis, dan berapakah pertambahan kereta peronda.
48. PN-1253-L16047
Datuk Raja Ropiaah binti Raja Abdullah minta **MENTERI DALAM NEGERI** menyatakan adakah pihak Kementerian bercadang untuk menggubal satu undang-undang Pengkhianatan atau *Treason Act* bagi menangani perbuatan khianat dan curang warganegara yang jika dibiarkan dan tidak ada tindakan yang sewajarnya, dikhuatiri akan menjelaskan keharmonian, kerukunan dan semangat patriotik rakyat kepada negara.
49. PN-1253-L15817
Dato' Mohammed Najeeb bin Abdullah minta **PERDANA MENTERI** menyatakan status projek RAPID di Pengerang, Johor. Apakah industri petrokimia yang dirancang kelak tidak mempunyai sistem pembangunan mampan dan menitik beratkan alam sekitar.
50. PN-1253-L15471
Tuan Haji Muhamad Yusof bin Husin minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah-langkah dan tindakan yang diambil oleh Kementerian terhadap pengemis tempatan dan asing yang semakin ramai mengemis pada masa kini.

51. PN-1253-L16137

Tuan Baharudin bin Abu Bakar minta **MENTERI PENGAJIAN TINGGI** menyatakan masalah pelajar Malaysia yang menuntut di universiti luar negara atau kolej-kolej tempatan yang masih berdepan dengan masalah diploma atau ijazah mereka tidak diiktiraf oleh Lembaga Akreditasi Negara (LAN). Apakah usaha-usaha yang telah dibuat oleh pihak Kementerian dan agensi untuk mengelakkan masalah ini daripada berterusan dan pelajar membazirkan masa dan wang ringgit.

52. PN-1253-L15944

Dato' Dr. Firdaus bin Haji Abdullah minta **PERDANA MENTERI** menyatakan sehingga kini sejauh manakah EKUINAS (Ekuti Nasional Berhad) telah berjaya melaksanakan program-program yang konkret untuk meningkatkan penyertaan Bumiputera dalam ekonomi negara. Sejauh manakah EKUINAS akan merangkumi semangat dan matlamat mewujudkan Masyarakat Perdagangan dan Perindustrian Bumiputera (*Bumiputra Commercial and Industrial Community = BCIC*) seperti terangkum dalam Dasar Ekonomi Baru (DEB) 1970-1990 dahulu.

53. PN-1253-L16112

Dato' Syed Ibrahim bin Kader minta **MENTERI PELAJARAN** menyatakan daripada 523 SRJK Tamil terdapat hanya 4 orang keturunan India Muslim dilantik sebagai guru besar dan kesemua mereka ini adalah guru veteran. Adakah Kementerian mempunyai syarat tertentu atau komposisi kaum tertentu untuk dilantik ke jawatan guru besar SRJK Tamil.

54. PN-1253-L15604

Puan Hajah Khairiah binti Mohamed minta **PERDANA MENTERI** menyatakan status agama Islam di Malaysia sama ada ia adalah "agama rasmi Persekutuan" atau "agama Persekutuan".

ATURAN URUSAN MESYUARAT DAN USUL-USUL

- | | | | |
|----|----------------|---|-------------------------------|
| 1. | (D.R. 31/2012) | Rang Undang-undang Perbekalan 2013 - Menyambung semula Perbahasan atas masalah, "Bahawa Rang Undang-undang ini dibacakan kali yang kedua sekarang."
(11 Disember, 2012) | |
| | | [Menteri Kewangan] | |
| 2. | (D.R. 35/2012) | Rang Undang-undang Kewangan (No. 2) 2012 | Bacaan Kali Yang Kedua |
| | | [Menteri Kewangan] | |
| 3. | (D.R. 40/2012) | Rang Undang-undang Perkhidmatan Kewangan 2012 | " |
| | | [Menteri Kewangan] | |
| 4. | (D.R. 41/2012) | Rang Undang-undang Perkhidmatan Kewangan Islam 2012 | " |
| | | [Menteri Kewangan] | |
| 5. | (D.R. 39/2012) | Rang Undang-undang Bank Negara Malaysia (Pindaan) 2012 | " |
| | | [Menteri Kewangan] | |
| 6. | (D.R. 37/2012) | Rang Undang-undang Penyelarasian Pencen (Pindaan) 2012 - Menyambung semula Perbahasan atas masalah, "Bahawa Rang Undang-undang ini dibacakan kali yang kedua sekarang."
(4 Disember, 2012) | |
| | | [Menteri Di Jabatan Perdana Menteri] | |
| 7. | (D.R. 32/2012) | Rang Undang-undang Pengurusan Strata 2012 | " |
| | | [Menteri Perumahan dan Kerajaan Tempatan] | |
| 8. | (D.R. 38/2012) | Rang Undang-undang Reka Bentuk Perindustrian (Pindaan) 2012 | " |
| | | [Menteri Perdagangan Dalam Negeri, Koperasi dan Kepenggunaan] | |

9. (D.R. 43/2012) Rang Undang-undang Perbadanan "Kemajuan Filem Nasional Malaysia (Pindaan) 2012

[Menteri Penerangan, Komunikasi Dan Kebudayaan]

10. (D.R. 42/2012) Rang Undang-undang Binatang (Pindaan) 2012 "

[Menteri Pertanian dan Industri Asas Tani]

11. PN-1253-U15525

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan supaya disegerakan proses memansuhkan hukuman mati mandatori berdasarkan kepada maklumat berikut:- Menteri di Jabatan Perdana Menteri, Datuk Seri Mohamed Nazri Abdul Aziz berkata, beliau akan mengadakan perjumpaan dengan Perdana Menteri, Datuk Seri Najib Tun Razak dalam masa terdekat bagi membincangkan mengenai satu inisiatif akan dilakukan bagi mewujudkan moratorium (penangguhan) terhadap hukuman mati terhadap mereka yang didapati bersalah memiliki dadah. Mohamed Nazri menegaskan yang Kerajaan sedang menimbang cadangan menangguhkan pelaksanaan hukuman mati terhadap pesalah dadah di negara ini sementara menunggu hasil kajian semula yang dijalankan Pejabat Peguam Negara. Katanya hukuman ganti kes pemilikan dadah sedang dikaji Pejabat Peguam Negara. Sementara, Mohamed Nazri akan berbincang dengan Perdana Menteri supaya kes pemilikan dadah, mereka yang dijatuhi hukuman (mati), akan diminta moratorium, jangan digantung sebab Kerajaan kita sedang meneliti hukuman sedia ada. Mohamed Nazri juga berkata, permohonan moratorium itu wajar memandangkan sebahagian daripada 900 orang yang sedang menunggu hukuman mati ketika ini adalah pesalah dadah. Perlu disebut, kajian ini dilakukan bertujuan menyelamatkan nyawa rakyat Malaysia di luar negara seperti China, Columbia, Peru dan Venezuela yang berdepan hukuman mati akibat menjadi keldai dadah. Antara hukuman terbaik bagi menggantikan hukuman mati mandatori bagi pesalah dadah, Mohamed Nazri berkata, hukuman penjara 30 atau 35 tahun boleh dikenakan kerana kesalahan itu tidak lagi dianggap serius seperti jenayah pembunuhan. Jika hukuman mati mandatori bagi kesalahan dadah dimansuhkan, hakim akan menggunakan budi bicara dalam menentukan hukuman bagi pesalah dadah. Justeru, berdasarkan kepada senario berkaitan, saya mencadangkan agar Kerajaan mempercepatkan proses berkenaan. Jika perlu, satu jawatankuasa khas di peringkat Parlimen wajar diadakan. Ini penting demi untuk keharmonian dan kemakmuran sangat dan kebajikan kepada keluarga para pesalah."

[Menteri di Jabatan Perdana Menteri]

12. PN-1253-U15526

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan dan mengesa agar kebebasan media berlaku secara sistematik, berhemah dan berintegriti. Tanggapan kebebasan media bagi pemimpin politik berdasarkan kebebasan untuk media yang hanya menyebelahi mereka dan yang seiring dengan mereka sahaja. Politik dan media sememangnya saling memerlukan. Orang politik memerlukan media untuk mempromosi diri dan wawasan mereka dan media pula memerlukan ahli politik sebagai bahan penulisan mereka. Lazimnya hubungan antara ahli politik dan media bagaimanapun tidak selalu kekal harmoni sepanjang masa. Lazimnya ahli politik akan menyanjung media apabila cerita-cerita positif tentang mereka dilaporkan. Namun begitu, apabila berita yang dilaporkan itu tidak positif, media akan dipersalahkan kononnya untuk menjatuhkan reputasi ahli politik terlibat. Kini telah menjadi satu trend apabila media dijadikan "punching bag" oleh ahli politik untuk menafikan berita yang tidak memihak kepada mereka. Ironinya, pihak yang menjadikan media sasaran saman yang rata-rata angkanya mencecah jutaan ringgit dan pihak sama juga yang melaung-laungkan tentang kebebasan bersuara dan menuntut kebebasan media di negara ini. Keadaan berkenaan bukan melibatkan ahli politik sahaja tetapi meliputi sebuah masyarakat dalam konteks kebebasan media. Dan pengamal media yang berintegriti tidak takut untuk mempersempahkan berita berdasarkan fakta. Berani kerana benar. Mereka tidak takut dikritik mahupun menerima kutukan oleh pelbagai pihak. Justeru, bagi menentukan kebebasan media berlaku secara sistematik, berhemah dan berintegriti, apakah pihak Kementerian sedang merangka atau menggubal ke arah mana media negara ini sedang berada. Apakah kerajaan sedar bahawa satu majlis media kebangsaan perlu diwujudkan dan pertubuhan rasmi ini akan menjadi pemantau bagi kedua-dua pihak iaitu pengamal media dan masyarakat. "

[Menteri Penerangan, Komunikasi dan Kebudayaan]

13. PN-1253-U15527

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan agar institusi kewangan mempertimbangkan untuk mempermudahkan pemberian pinjaman kepada pencipta produk inovasi termasuk membabitkan teknologi hijau dalam usaha melahirkan lebih ramai lagi generasi pencipta. Menteri Sains, Teknologi dan Inovasi, Datuk Seri Dr. Maximus Johnity Ongkili menegaskan bahawa sehingga kini banyak syarikat yang mahu membuat pinjaman untuk menjayakan penciptaan sesuatu produk, namun tidak dapat berbuat demikian ekoran syarat ketat institusi kewangan. Justeru, kerana mereka tidak mempunyai rujukan kejayaan lampau ciptaan berkenaan dan menganggap ia sukar dipasarkan. Untuk tujuan itu, pihak kementerian wajar membentuk satu jawatankuasa khas dengan Kementerian Tenaga, Teknologi Hijau dan Air serta Kementerian Kewangan untuk menyelaras kaedah bagi membantu pencipta terbabit. Kita juga berharap agar peserta atau pemohon dibantu dengan segera, sekali gus dapat menyelesaikan masalah pertimbangan insitusi kewangan yang memproses permohonan itu mengikut prinsip perbankan biasa. Saya juga mencadangkan agar insitusi kewangan mempertimbangkan untuk memberi nilai kepada hak intelek sesuatu produk inovasi yang dibentangkan pencipta bagi proses permohonan pinjaman.

Jika ini dapat dilakukan, sudah pasti akan membantu dan menggalakkan para pencipta untuk menghasilkan produk yang bukan sahaja dapat memanfaatkan kepada masyarakat, bahkan dikomersialkan bagi menjana pendapatan yang tinggi."

[Menteri Sains, Teknologi dan Inovasi]

14. PN-1253-U15528

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar penglibatan sektor swasta juga diambil kira dalam memantapkan Pelan Pembangunan Pendidikan (PPP) yang dilancarkan oleh Perdana Menteri baru-baru ini yang menekankan kepada konsep ilmu yang mampu dimanfaatkan oleh generasi yang akan datang iaitu selari dengan tuntutan semasa dunia/global. Pelan berkenaan cukup rapi dan kemas di dalam mencipta hala tuju negara ke arah negara maju pada tahun 2020. Pelan yang mantap berkenaan semestinya memerlukan pemahaman dan pelaksanaan yang strategik di kalangan warga pendidik, ibu bapa dan para pelajar. Pelan yang mempunyai tiga gelombang iaitu pada 2013-2015; 2015-2020 dan 2020-2025 itu telah mengambil kira pelbagai harapan, rintangan, cabaran, situasi dunia dan perkembangan kemahiran di kalangan masyarakat. Contohnya, apakah vokasional dan kemahiran (hand-on) telah dihidupkan dan diperkemaskan yang wajar diperkembangkan kepada para pelajar di peringkat sekolah menengah lagi. Ianya sebagai usaha untuk mengimbangi di antara ilmu bersifat akademik dan bersifat kemahiran. Kedua-duanya sudah pasti akan menjadikan negara kita lebih maju di dalam aspek pelajaran dan pembelajaran. Menyedari hakikat berkenaan, saya merasakan pelan berkenaan akan lebih mantap sekiranya peranan sektor swasta diambil kira. Pihak swasta akan menjadi pemangkin kepada konsep pembelajaran sepanjang hayat. Semua firma dan kilang-kilang bertaraf antarabangsa perlu melaksanakan CSR mereka dan memberi ruang/ peruntukan kewangan kepada para pelajar yang ingin melanjutkan pelajaran ke peringkat yang lebih tinggi. Konsep ini telah dilaksanakan dengan jayanya di Australia dan Jerman. Sementara, para pelajar lepasan institusi kemahiran perlu difikirkan tentang ganjaran kepada mereka melebihi daripada yang berasaskan akademik semata-semata. Di masa sama, universiti awam/swasta hendaklah diperbanyakkan di negara ini sehingga peringkat PhD. Lebih penting supaya hasrat pelan ini menjadi kenyataan selari dengan Model Baru Ekonomi (MBE) ke arah menjadikan Malaysia sebuah negara maju berpendapatan tinggi."

[Menteri Pelajaran]

15. PN-1253-U15529

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan dan mencadangkan agar projek Perumahan Rakyat PR1MA di perbanyakkan lagi dan proses permohonannya dipermudahkan memandangkan rumah atau perlindungan merupakan salah satu keperluan manusia di dunia ini. Rumah juga merupakan suatu jaminan keselamatan dan kesihatan kepada penduduk dunia. Akibat kekurangan rumah atau tempat tinggal yang tidak terurus atau tidak menepati piawaian atau tidak lengkap atau tidak sesuai didiami, sudah tentu akan mewujudkan penyakit masyarakat yang lain termasuk penyalahgunaan najis dadah, kecurian, rogol, rompak, samun dan lain-lain.

Atas sifat dan kesedaran akan kepentingan rumah kepada penduduk negara ini, pelbagai program telah dilaksanakan antaranya rumah mesra rakyat, rumah PPRT, rumah mampu milik dan rumah kos rendah/sederhana yang telah mendapat sambutan hangat di kalangan rakyat. Namun, melihat kepada penduduk negara kita yang berkembang pada kadar 3.5% setahun, saya rasa pertambahan berkenaan terus meningkat kepada keperluan rumah untuk berlindung. Justeru, pengekalan dan pelaksanaan rumah PRIMA adalah antara yang terbaik terutamanya di kalangan penduduk bandar. Bagaimanapun bilangan rumah berkenaan masih kecil dan perlu diperbanyakkan lagi. Saya suka mencadangkan agar pihak Kementerian Perumahan dan Kerajaan Tempatan (KPKT) terus memberi ruang kepada GLC atau anak syarikat Kerajaan negeri untuk membina rumah PRIMA di samping SPNB dan UDA. Sementara, KPKT juga diminta mempermudahkan proses permohonan secara online dan memberikan jawapan segera terhadap permohonan berkenaan. Ini penting sebagai slogan "Rumahku Syurgaku" yang memberi kesan psikologi kepada pemohon (rakyat) kerana dirasakan mereka dihargai. Kalau sesuai, rumah kedua/ketiga juga boleh ditimbangkan kepada pemohon sekiranya berlaku lambakan kepada rumah-rumah PRIMA."

[Menteri di Jabatan Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.50	Laporan Tahunan dan Penyata Kewangan Lembaga Perkhidmatan Kewangan Labuan (Labuan FSA) Bagi Tahun 2011	12 Disember 2012
ST.53	Laporan Tahunan dan Penyata Kewangan Akademi Sains Malaysia Bagi Tahun 2011	12 Disember 2012
ST.55	Laporan Tahunan dan Penyata Kewangan Lembaga Tabung Haji Bagi Tahun 2011	12 Disember 2012
ST.86	Laporan Tahunan dan Penyata Kewangan Lembaga Totalisator Malaysia Bagi Tahun 2011	12 Disember 2012
ST.88	Laporan Tahunan dan Penyata Kewangan Lembaga Koko Malaysia Bagi Tahun 2011	12 Disember 2012
ST.89	Laporan Tahunan dan Penyata Kewangan Lembaga Lebuhraya Malaysia (LLM) Bagi Tahun 2011	12 Disember 2012
ST.92	Laporan Tahunan dan Penyata Kewangan Lembaga Kemajuan Wilayah Kedah (KEDA) Bagi Tahun 2011	12 Disember 2012
ST.94	Laporan Tahunan dan Penyata Kewangan Perbadanan Produktiviti Malaysia (MPC) Bagi Tahun 2011	12 Disember 2012
ST.95	Laporan Tahunan dan Penyata Kewangan RRIM-Consult Corporation Bagi Tahun 2011	12 Disember 2012
ST.103	Laporan Tahunan dan Penyata Kewangan Perbadanan Harta Intelek Malaysia (MyIPO) Bagi Tahun 2011	12 Disember 2012
ST.104	Laporan Tahunan dan Penyata Kewangan Suruhanjaya Pengangkutan Awam Darat (SPAD) Bagi Tahun 2011	12 Disember 2012

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.109	Laporan Tahunan dan Penyata Kewangan Yayasan Tun Razak Bagi Tahun 2010	12 Disember 2012
ST.111	Laporan Tahunan dan Penyata Kewangan Perbadanan Pengurusan Sisa Pepejal dan Pembersihan Awam Bagi Tahun 2011	12 Disember 2012
ST.142	Akta Cukai Pendapatan 1967 dan Akta Petroleum (Cukai Pendapatan) 1967. Perintah Pelepasan Cukai Dua Kali (Kerajaan Wilayah Pentadbiran Khas Republik Rakyat China Hong Kong) 2012.	12 Disember 2012
ST.143	Akta Cukai Pendapatan 1967 dan Akta Petroleum (Cukai Pendapatan) 1967 Perintah Pelepasan Cukai Dua Kali (Kerajaan Republik India) 2012.	12 Disember 2012
ST.144	Akta Cukai Pendapatan 1967 Perintah Pertukaran Maklumat (Kerajaan Bermuda) 2012	12 Disember 2012